

東
華
續
錄

東華續錄

臣周綽蕃恭校

道光三年癸未春正月辛未朔諭本年朕於元旦御殿受賀履端肇慶因念諸王誼屬宗親允宜首錫新釐以昭惇敘儀親王之子貝勒綽志著加恩賞還郡王職銜仍於每年俸銀二千五百兩之外加賞銀一千兩惇親王瑞親王俱著加恩在內廷行走慶郡王綽懋著加恩賞帶三眼花翎定親王奕紹之子載銓著加恩晉封二等鎮國將軍以示朕眷篤懿親覃敷闡惠至意○免莊郡王麟課大學士托津等本任前任鑄級處分有差○癸酉諭軍機大臣等那彥成等奏河北野番及察罕諾們汗全數回巢並酌移河南四旗蒙古各一摺青海黃河以北屢經番族占據察罕諾們汗一

族復勾結漢奸夥同搶掠經那彥成等設卡防堵斷絕糧茶並訪獲漢奸巨盜及偷窆金沙各犯分別懲治見據察罕諾們汗稽顙乞命所屬蒙番全數押回河南貴德原牧各族野番勢已窮蹙自可寬其一綫惟河北不可復留野番一人使漢奸蒙古無所假借方爲正本清源之道所有偷住河北之貴德循化各番族共一萬七八千人見已全數回巢著該督等派委幹員卽將河南各族野番逐一編查設立千戶百戶等分別管轄仍各按戶口與蒙古一律易買糧茶由各族千戶就近代爲請票如有爲匪不法及偷渡河北之人卽不准請票易糧並著於野番南渡時查明本係何族卽交該族千百戶遞管安插各處渡口分派把守儻有一人私渡卽將該千百戶一律治罪該番族經此次懲創之後管束旣嚴門戶亦別其勢愈分其力愈弱自屬一勞永逸之計其請將該番族

比照玉舒番子之例立定貢馬章程於約束之中仍寓羈縻之意
著卽妥議章程具奏至另摺奏河南四旗蒙古扎薩克郡王達什
仲鼎等較河北各旗稍爲富強因屢被野番賀爾族侵掠不遑安
居請遷居河北助勒蓋一帶酌給口食並派循貴營員沿途護送
等語該四旗蒙古游牧河南已久此時若令移居河北是先示番
賊以弱如移駐後該蒙古不能自固藩籬或番賊復行渡河搶掠
仍恐不能相安此事務當籌畫萬全不可輕議更張致將來又滋
流弊其河北原住二十四旗蒙古除合吉恩開巴雅爾一旗尙堪
自衛外餘二十三旗扎薩克大半避入內地並有散處邊內插帳
住牧及沿途乞食者自應妥爲安置所有各旗蒙古散失戶口著
該督卽飭令各府州縣於編查邊內居民保甲時查明該蒙古姓
名旗分分起押交各該旗王公合吉領回住牧其實係窮苦無依

者如捐賞口食銀兩尙有不敷卽著奏明酌發賞需以資接濟該督等務須妥爲經理使內地不得存留蒙古亦不使蒙古界內私藏漢奸俾各安生業永靖邊陲方爲不負委任○葉世倬以年老休致調孫爾準爲福建巡撫以陶澍爲安徽巡撫徐承恩爲安徽布政使蔡炯爲甘肅按察使

由浙江鹽運使遷

○丙子諭惇親王在內侍

皇考多年同朕仰承教訓一切禮法靡不周知乃甫經分府卽有該王福晉乘輜徑由神武門中門行走之事當卽特派王大臣等查明是實朕不得不治以應得之咎然究係無心之過孰意惇親王設法剖辨始則差太監潛赴英和私宅關說繼則致意瑞親王在朕前分辨朕卽令刑部將該府太監轎夫等復行詳訊並令傳喚協尉四十八當堂指實今據刑部覆奏遵旨訊問三面質對實係由中門行走惇親王巧爲脫卸強詞苟且無恥之故態復

萌所謂心勞日拙者也當其分府之前伊同瑞親王屢經召見訓示周詳旬日之間舉動若此朕深愧化導無方仍著宗人府遵照前旨加等嚴議三日內具奏所有樂部事務著定親王奕紹管理雍和宮中正殿著慶郡王蘇綿管理特諭○丁丑唐仲冕以年老休致以常文爲陝西布政使錢寶甫爲陝西按察使

○召陳廷桂來京以林則徐爲江蘇按察使

通准

○戊寅諭宗

人府奏遵旨加等嚴議惇親王請革去王爵等語惇親王於伊福晉乘輜徑由神武門行走設法剖辨巧爲脫卸宗人府照違制革職例議以革去王爵實屬各所應得惟念惇親王究係甫經分府諸未諳習著加恩改爲罰親王俸五年每年仍准支領一半分作十年坐扣○詔諭廓爾喀額爾德尼王熱尊達爾畢噶爾瑪薩野朕臨御天下柔遠能通俾寰海共享雍熙自王襲爵以來恪守小

心恭順黽免一切事宜謹照駐藏大臣指示遵行甚屬可嘉茲特
遣噶箕達納彭咱邦禮等恭請朕安復賀朕躬御極呈進表貢朕
俱嘉閱鑒爾之誠召爾來使賞宴數次茲因噶箕達納彭咱邦禮
旋歸特降詔書賞爾雜色大段玉如意等物一併交付噶箕達納
彭咱邦禮齋去給爾祇領嗣後爾尤當感激朕恩遵照駐藏大臣
指示仍前恭順竭盡惓誠盡力管束屬下各令安居樂業以期永
沐朕澤欽哉勿怠特諭○己卯諭軍機大臣等孫玉庭奏自陳年
力較衰請簡賢能以重東南要任一摺孫玉庭歷任封圻經朕授
爲協辦大學士仍留兩江總督之任雖年逾七旬而精力未衰正
當爲國宣勤永承眷注茲該督奏精神漸不如前每遇事冗輒有
遺忘恐滋貽誤一片公誠之意朕已深悉尙其益加懋勉努力奉
公以副委任所請不允當體朕心○孫玉庭奏謝賞福字壽字得

旨朕所以賜卿福壽二字者正欲卿福壽兼全永承眷注爲國宣力也勉之○壬午 上幸圓明園奉 皇太后居綺春園○甲申

撥河南山東漕十八萬石備直隸省南賑需○丙戌陸以莊以病

免轉程國仁爲刑部左侍郎以史致儼爲刑部右侍郎軸內閣○

戊子戴均元等會勘漳河請仍潛借河允之○庚寅以裕泰爲湖

南按察使由四川成縣龍茂道遷○甲午諭泰承業前經朕宣召來京加以

超擢令仍在上書房行走因伊老諄言語不謹不能不洽以應得

之罪朕睠懷舊學泰承業究係上書房行走多年之人此時年近

八旬著加恩賞還翰林院侍講學士銜不必來京謝恩以示體恤

○乙未命大學士長齡在軍機大臣上行走○以史致光爲左都

御史前任雲貴總督○調恩銘爲兵部左侍郎以廉善爲刑部左侍郎署

部左侍郎○庚子申諭孫玉庭嚴捕鹽梟○是月展賑奉天小黑山白

旗堡旗戶直隸霸州等三十六州縣江蘇海州水災給江蘇邳州等八州縣衛水災安徽宿州等十二州縣衛水災旱災河南武陟縣水災山東濮州等六州縣災民一月口糧貸浙江海鹽長興二縣旱災陝西留壩等十一廳州縣雹災水災甘肅靜甯等十七州縣地震災兩淮板浦等九場水災口糧河南武陟等三縣黑龍江齊齊哈爾墨爾根城旗丁水災籽種糧石江蘇駐紮災區之川沙等五營銀米並毗連災區之孟河等九營餉銀緩徵直隸開州等五十五州縣歉收額賦山東濮州等七十一州縣衛水災蟲災新舊額賦

二月辛丑朔諭國家定制諸臣中有勤於王事功在社稷者列入祀典用示酬勛其超躋宣勞之王大臣並有配饗之例本朝開國功臣王大臣等俱配饗 太廟雍正年間怡賢親王大學士鄂爾

泰張廷玉俱循此例乾隆年間增入超勇親王策凌嘉慶年間增入大學士傅恒協辦大學士尙書兆惠大學士福康安甚盛典也朕思原任大學士公阿桂乾隆年間仰蒙 皇祖高宗純皇帝簡

擢平定西陲旋經理新疆事務妥協周詳著有成效嗣辦大小金川畀以將軍重任秉承 方略堅持定見克蕲膚功又勦捕撒

拉爾及石峰堡回匪立就殄平圖形紫光閣者四次入任綸扉管理部務贊襄樞要二十餘年其閒奉使讞獄修築河隄捍禦海塘

懋績不著綜其生平端謹持躬公忠體國有古大臣之風嘉慶年

閒業經特沛 殊恩 賜諡文成並入祀賢良祠飾終之典備極

寵榮朕瞻懷耆舊軫念功勳宜隆追配之儀用副酬庸之典阿桂

著配饗 太廟以示朕崇獎蓋臣至意該部察例卽行○召左輔

來京調嵩孚爲湖南巡撫以程國仁爲貴州巡撫戴敦元爲刑部

左侍郎景謙爲湖南布政使調蘇成額爲貴州按察使裕泰爲四

川按察使以王楚堂爲湖南按察使

由福建題

○壬寅諭軍機大臣

等那彥成等奏據循貴文武各委員將回巢之察罕諾們汗屬下及野番各族逐細編查已查出歷年搶竊官馬贓物及熟番婦女見將渡口交各番頭目看守並遵旨將河南四旗蒙古仍留原牧等語回巢各番散處河濱欲其不渡河北全在地方文武員弁實力稽查周詳妥善俾野番自然懾服乃可歷久相安那彥成等此次督飭查辦河北實已肅清其叩頭悔罪看守渡口之番目等承充戶總並未賞給頂帶亦未另予賞號著俟一二年後如果野番絕迹再行奏請賞給頂帶並著嗣後責成西甯鎮道於春秋二季輪往循貴點驗門牌戶口如有一戶逃亡卽向該管戶總嚴追下落如係潛渡河北詢明住所飛報西甯大臣總督衙門立往擒拏

嚴切究辦編查番族爲邊疆要務那彥成等務當按照奏定章程飭屬奉行勿怠不可日久視爲具文以致番族覬覦復行偷渡也

○甲辰以特登額吉倫泰汪守和均爲內閣學士兼禮部侍郎銜

特登額由通政司副使吉倫泰由貢等侍衛遷正守和候補內閣學士

○丁未釋奠先師孔子○

上奉 皇太后幸惇親王縣愷第命惇親王縣愷仍在內廷行

走並免前罰俸三年○辛亥諭禮部議覆通政司參議盧浙奏請

以湯斌從祀 文廟一摺原任尙書湯斌學術精醇順治年間有

旨褒其品行清端康熙年間有 旨稱其老成端謹至其政績

卓著則禁侈靡興教化舉善懲貪興利除弊官嶺北時擒獲巨寇

以靖地方巡撫江蘇時毀不經之祀化闕很之風奏豁民欠議減

賦額還京之日部民送者十餘萬人其他奏議忠言讜論剴切詳

明正色立朝始終一節所學主於堅苦自持事事講求實用著書

立說深醇篤實中正和平洵能倡明正學遠契心傳湯斌著從祀
文廟東廡列於明臣羅欽順之次以崇實學而闡幽光○癸丑
上詣 文廟釋奠臨辟雍講學廣國子監乙酉科鄉試中額諭

祭酒等曰成均首善之地風勵天下實始於茲咨爾監臣式茲多
士尙其端乃教術正乃典型無卽於華無鄰於固入孝出弟擇友
親師庶幾成風紹休 聖緒惟爾監臣無曠厥職○諭禮部尙書
汪廷珍於嘉慶十七年蒙 皇考簡用上書房師傅與朕朝夕講
論非法不道學問淵博迨至二十三年受任總師傅以來倍加勤
慎考古證今談皆中道使朕通經義辨邪正受益良多又自朕親
政後畀以左都御史尙書之任辦理均能妥協是汪廷珍於師道
臣道之義可謂兼備矣本日臨雍講學因思曩者討論之功眷懷
舊學用沛恩施汪廷珍著加太子太保銜伊子汪報原見回籍守

制服關來京時該衙門遇有員外郎缺出卽行奏補用示朕崇儒重道之意著將此旨鈔錄一道交上書房存貯特諭○甲寅以故成郡王蘇勲第九女蘇拉格格未婚守志封貞節多羅格格賜

御書扁額額駙廉志殯葬如多羅額駙例○乙卯調祥德爲貴州按察使蘇成額爲河南按察使○丙辰 上奉 皇太后幸瑞親王縣忻第○己未濬直隸吳橋縣老黃河○是月加給直隸大城縣災民口糧

三月庚午朔諭軍機大臣等那彥成等奏請定商民與蒙古貿易章程並封閉邊外金廠西甯涼州等處向來商民攜帶貨物由西甯辦事大臣衙門給票出口徑赴蒙古游牧貿易既不指定地方去來亦無期限以致漢奸溷雜並夾帶違禁器物於邊陲大有關係惟念蒙古以游牧爲業若將羊客禁絕誠恐生計日艱如漫無

稽察又復諸弊叢生該督等請嚴立章程明定地界自應如此覈實辦理嗣後無論何州縣羊客與河北蒙古及河南蒙古番子交易卽以見定地界爲限不許徑赴蒙番游牧處所收買至甘涼肅州羊客准由野馬川沿邊一帶行走先行報明西甯辦事大臣衙門分別發給大票小票逐一註明嚴定期限由西甯府知會各提鎮飭知守卡弁兵據實查驗無許浮冒其蒙古羊隻每年定以四月至九月按照指定處所售賣事竣不准逗留以杜弊端至河南番族出售羊隻並飭循貴兩廳於貿易時照給票之例辦理此外甘州之野牛溝肅州之赤金湖等處向有漢奸偷挖金沙見經該督等嚴拏查禁惟大通縣屬之扎馬圖官金廠該匪徒等難保不乘閒潛往開採著卽嚴行封閉所有應納正撤課金二十八兩零卽停其交納此項人夫糾聚已久該督等務須妥爲安插無致流

而爲匪如經理不善仍有匪徒涖迹偷竄致生事端惟該督等是問○壬申諭禮部奏原任大學士公阿桂配饗太廟位次朕思追配之文本示酬庸之典其安設牌位自應以服官先後爲序兆惠雍正年間卽已筮仕傳恒阿桂均係乾隆初年服官福康安係乾隆三十二年始行供職所有配饗西廡牌位傳恒著列於兆惠之次阿桂著列於傳恒之次福康安著列於阿桂之次○癸酉堵築直隸文安縣屬漫口○撥豫漕一萬石發直隸霸州等六州縣平糶並命保定等六縣平糶倉穀○乙亥上親耕藉田○丙子上奉上奉皇太后幸南苑上行園○辛巳上奉上奉皇太后還京師○再撥南糧六萬石及通倉米四萬石發直隸霸州等州縣平糶○癸未上奉上奉皇太后幸含輝樓上騎射並閱皇子及親王侍衛等騎射○甲申兩廣總督阮元奏官員子孫仰蒙予

廕原係非常曠典豈容漫無區別查故閩安協副將張保原係粵洋大盜經官兵勦捕於嘉慶十五年投誠其子嗣若一體予廕殊不足以重名器應請撤除得旨不必撤除廕生著賞給千總無庸送部引見○庚寅以山東濟甯等十九州縣糧價增昂命平糶倉穀○甲午上奉皇太后閱健銳營兵○戊戌召阿霖來京調程含章爲江西巡撫起琦善署山東巡撫前任山東巡撫○命前任江蘇按察使程廷桂以三四品京堂候補○己亥諭朕伯成親王永理天資超邁學問淵深自幼卽仰承皇祖高宗純皇帝恩眷迨嘉慶初年皇考仁宗睿皇帝簡任軍機大臣領侍衛內大臣管理宗人府及部旗事務俱能恪恭職守並以王精於書法特旨命書裕陵聖德神功碑又將詒晉齋墨刻頒賞臣工朕親政以來因念王年齒旣高凡遇內廷宴齊召對特免叩拜上年染患痰證

步履維艱論以在家靜養仍食全俸並屢遣人存問方冀舊病漸愈今遽聞薨逝實深震悼著賞給陀羅經被派大阿哥卽日帶領侍衛十員代朕前往賜奠著加恩於例賞外由廣儲司庫賞銀五千兩經理喪事朕再示期親臨賜奠以示優卹所有飾終典禮著該衙門察例具奏尋賜祭葬諡曰哲○是月加給直隸文安縣災民一月口糧

夏四月壬寅免河南蘭陽縣嘉慶二十四年因災蠲贖並熟地逋

賦○甲辰諭顏檢自簡任直隸總督以來辦理均無貽誤惟年近七十究恐精力不逮有失整頓著來京另候簡用蔣攸銛著補授直隸總督不准以身係旗人世居寶坻爲辭再族人眾多難於約束必然據情懇請蔣攸銛受 兩朝知遇厚恩惟當力圖報效國而忘家無論旗民事務一秉大公而已况伊歷任督撫皆能公幹

廉明政聲彰著朕所素知設令再四懇求亦不能俯從所請也爲

國宣力其道諭行○調那清安爲刑部尙書玉麟爲兵部尙書以

穆克登額爲禮部尙書

由戶部左侍郎遷

○調楊健爲甘肅布政使朱桂

楨爲山東布政使○丙午轉穆彰阿爲戶部左侍郎調恩銘爲戶

部右侍郎轉常英爲兵部左侍郎調耆英爲兵部右侍郎以明志

爲理藩院右侍郎松廷爲內閣學士兼禮部侍郎銜

服闋西甯辦事大臣○

己酉河南漳河漫口合龍○庚戌 上臨故成哲親王永璉第賜

奠○免福建勦辦臺匪案內節次數減攤扣未完銀一百七十九

萬餘兩○辛亥撥奉天復州甯海縣倉穀一萬五千石備承德縣

民食○甲寅召丁憂回籍將次服闋前任河東河道總督張文浩

來京○庚申裁陝西鳳翔府通判留壩廳南星巡檢各一添設安

康縣撫民通判甄坪巡檢各一改甄坪縣丞爲略陽縣丞移華陰

縣丞爲盩陽縣丞○辛酉以顏檢署工部左侍郎○癸亥命於
黑龍潭 覺生寺設壇祈雨 上躬禱於 覺生寺○ 上再臨
故成哲親王永琨第賜奠○甲子賜林召棠等二百四十六人進
士及第出身有差○丙寅雨○是月緩徵江蘇邳州等九州縣衛
上年毗連災區各村莊新舊額賦

五月辛未前湖南巡撫左輔以年老休致○乙亥諭嗣後直省徵
收錢糧將墊完民欠名目永遠革除○壬午以內閣學士松廷爲
西甯辦事大臣○甲申候補內閣學士莫晉因病乞假回籍允之
○丁亥移四川太平廳駐城口爲城口廳定文武學額各三名改
太平廳仍爲太平縣以巴州所屬錫團園等處地方隸之定文武
學額各六名裁巴州文武生額各一名○是月展賑直隸霸州等
三十六州縣災民

六月庚子築山西河東鹽池馬道護隄並濬姚暹渠李綽堰涑水
河○壬寅命署工部侍郎張文浩會同蔣攸銛查勘南北運河並
永定大清滹沱各河○癸卯前江西巡撫阿霖以年老休致○己
酉召盧元煒來京起訥爾精額署山東按察使丁憂前在滄南按察使○甲
寅允蔣攸銛截留江廣漕米四十萬石存津倉備撥○戊午永定
河溢○壬戌北運河決○乙丑添設甘肅循化廳主簿貴德廳照
磨各一裁按察司照磨皋蘭縣河橋主簿各一○是月加給直隸
靜海青縣二縣災民兩月口糧貸河南汝陽正陽二縣倉穀緩徵
浙江建德淳安二縣水災直隸趙州等十一州縣旱災霰災河南
內黃縣霰災新舊額賦山東郊城等八縣霰災額賦並貸籽種

東華續錄

道光八

臣王先謙敬編

臣周綸蕃恭校

秋七月戊辰史致光以疾免以陸以莊爲左都御史

由署吏部右侍郎遷

○

辛未以故順承簡郡王倫柱子春山襲爵○庚辰以直隸霸州等

十州縣被淹較重飭撥銀米先行撫恤○裁貴州歸化廳屬生苗

枝土千總○壬午撥京倉米五萬石給五城平糶○癸未免直隸

嘉慶十八年軍需攤廉未扣銀七十餘萬兩○乙酉諭內廷向存

各省道府名單以備查閱朕因歷年已久不符者居多將名單另

鈔一分面交軍機大臣等諭令查明更換並未向奏事處太監等

提及一字乃曹進喜妄逞己見輒敢在勤政門外向軍機大臣等

查問聲稱吏部疲玩詞色俱厲經軍機大臣等面奏朕特派縣課

任廷珍那清安將太監曹進喜面訊據曹進喜供認係伊自出主見令吏部開單送伊閱看並欲定以期限如到期不換伊須查問並欲向兵部堂官要武職各冊等語我朝 列聖相承 家法極爲嚴肅太監不過供官廷灑掃奔走之役從不許干預朝政所以杜漸防微者至深且遠曹進喜在內廷參養多年於伊職分內不應辦之事輒敢越分干預出言無狀實屬狂妄可惡之至此風斷不可長曹進喜著革去五品總管交乾清門總管太監重責二十板另派差使並將此旨載入宮中見行則例○分設京城外蘆溝橋四處飯廠並飭直隸被水各州縣設廠煮賑○丁亥諭載銳係成哲親王之嫡曾孫著襲封成郡王縣愐係成哲親王之庶子已封爲二等鎮國將軍縣總亦著加恩晉爲二等鎮國將軍以示朕篤念本支惇敘懿親至意○直隸總督蔣攸銑奏請速撥大賑經

費得旨直省連年水澇皆朕不德不能上感天和致我無辜赤子
荐受災荒何忍觀此景象惟有返身修己盡力拯濟庶救顛沛之
危但國家經費有常雖重帑用之於百姓原不稍爲吝惜若令奸
胥猾吏趁機吞取則大不可卿受國家任用厚恩且才能素著任
事實心必須妥爲經理俾災黎均霑實惠奸猾不得侵漁斯爲不
負委任而朕用人亦光顏面矣勉之又勉○戊子移安徽潁州府
驛口橋捕盜同知駐艾亭集爲撫民總捕同知並增把總一改前
裁之鳳陽府司獄爲巡檢並增外委一均駐宿州時村集增潁州
營方家集亳州營張村鋪宿州營夾溝驛外委各一○己丑撥部
庫及各關稅銀一百八十萬兩備直隸賑需並永定河工需○河
南漳河溢○庚寅諭御史趙柄奏請敕停各省停止分發佐雜人
員一招向來佐雜等官因部中銓選較難照例分發各省試用挨

次輪補嗣以歷年分發既多各該省人浮於缺日形壅滯節經直隸山東河南山西陝西江蘇等省奏請暫停分發均已降旨准行原因該員等一經分發在省差委各督撫隨時甄覈其流品才具固所深悉補缺後既得及時自效亦可造就人材將來漸次疏通仍照常辦理並非使各省遞相倣效永遠停止若如該御史所奏令各督撫設法調劑不得請停分發是佐雜等選期本屬遙遠分發到省又復擁擠至數百人之多守候至數十年之久旅進旅退得缺無期甚非所以恤微末而權銓政也所奏著無庸議○壬辰諭國家設官分職內外並重外省道府州縣等官固有察吏安民之責在京各部院司員綜覈外省奏咨事件政務殷繁亦須明幹勤慎方資治理乃近年以來各省督撫率請將衰庸之員以京職改補將來人數增多必致庶司曠誤於吏治大有關係嗣後外任

道府以下知縣以上各官如有才具平常及年老衰邁者著該督撫等遵照定例甄別改簡降補及勒令休致槩不得奏請以京職改補儘違例請改該部卽奏明更正仍將該督撫照例議處其從前改補京職各員並著各該堂官留心察看如有衰庸不能勝任者卽隨時撤汰不得稍事姑容至因病解退之外任官員病痊起補時槩不准呈請改補京職以歸畫一○諭軍機大臣等原任直隸水利營田觀察使陳儀著有直隸河渠志於畿輔諸水沿波討源而於永定河議論尤詳又據御史余文銓將陳儀文集進呈內載文安河隄事宜四河兩淀私議永定引河下口私議治河蠹測篇似有所見陳儀籍隸文安又身預水利諸事於畿輔水性地形知之較悉惟自雍正年間迄今幾及百年其閒水道通塞分合或不免今昔之殊而援古證今足資採取朕前派張文浩等會同蔣

攸銛將南北運河並永定大清潭沱各河情形悉心查勘通籌全局近又命張文浩會同蔣攸銛辦理永定河堵築事宜特發去直隸河渠志一冊及陳儀文集直隸河道事宜一本著蔣攸銛等詳悉查閱以備考證該督等務須酌古準今計出萬全以副朕講求水利保衛民生之至意○癸巳命五城先期兩月開廠煮賑○改廣西平樂府通判爲平樂縣縣丞駐沙子河○乙未以江蘇水災免各關商米稅銀○丙申免河南應攤川楚及衛案軍需銀四百六十餘萬兩○是月給江西德化縣湖北黃梅縣江蘇太倉等十七州廳縣水災一月口糧加賑直隸通州等二十一州縣水災八月丁酉朔再截撥江西九江等三幫漕米備直隸賑需○戊戌諭本日據吏兵二部奏請酌定失察鴉片煙條例鴉片煙一項流毒甚熾總由地方官查拏不力所致向來地方官止有嚴參賄縱

之例並無議處失察之條且止查禁海口洋船而於民間私熬煙片未經議及條例尙未周備嗣後如有洋船夾帶鴉片煙進口並奸民私種罌粟煎熬煙膏開設煙館文職地方官及巡查委員如能自行拏獲究辦免其議處其有得規故縱者仍照舊例革職若止係失於覺察按其煙片多寡一百斤以上者該管大員罰俸一年一千斤以上者降一級留任五千斤以上者降一級調用武職失察處分亦照文職畫一辦理其文武官拏獲煙斤議敘均著照舊例行至滇省迤西迤東一帶將罌花熬爲鴉片必須嚴爲禁止著該督撫嚴飭地方官曉諭居民不准私種罌粟以淨根株○己亥初舉經筵上詣傳心殿行禮御文華殿經筵幸文淵閣賜講官及聽講諸臣茶復賜宴於本仁殿自是以爲常○庚子命孫玉庭委員採買四川湖廣江西米石備安徽災區平糶○癸卯

復松筠頭品頂帶○乙巳諭軍機大臣等御史程喬采奏直隸貧民出口謀生請敕各關口詢明來歷放行一摺所奏甚是向例民人出口憑票放行原以杜奸匪而嚴管鑰至遇饑饉之年貧民車載襁負或依倚親族或出口傭趁亦屬事所恒有從前乾隆嘉慶年間辦理荒政俱聽其出口謀生係一時權宜之政此等窮黎勢不能紛紛請票但當問明來歷並詢其將往何處投止卽行知所往地方俾得有所稽覈本年直隸災區較廣如該御史所奏風聞各處關口留難向阻一槩不准放行該民人甫抵關門又復長途紆折其情極爲可憫該督接奉此旨卽迅速行知直隸所屬各關口除商賈行旅及形迹可疑之人仍照舊例驗票放行外其實係覓食災民止須問明來歷以備稽查毋得槩行攔截俟來歲春融情願回籍耕種者卽任其復業可也○壬子諭軍機大臣等前據

蔣攸銛片奏此次恭辦大差未便仍照往年借資民力見給發銀兩敬謹辦理至冬春需用車輛係取自民間州縣不能全數賠墊亦應量予津貼共需銀十萬兩先於運庫生息項下借墊分年攤廉歸還等語已批示依議妥辦矣朕思力役之徵從古所有我朝自聖祖仁皇帝以來列聖相承凡遇謁陵及熱河秋獮巡幸盛京恭謁祖陵諸大典或每歲舉行或閒歲舉行皆不能不借資民力卽閒有偏災如嘉慶六年之水我皇考仁宗睿皇帝於此年七月仍舉行熱河秋獮之典彼時未聞累及閭閻亦未有借墊捐廉之事誠以直隸民賦本輕偶遇災荒則蠲緩賑恤有加無已厚澤深仁至優極渥卽偶用以力亦分所宜然本年直隸被水朕恫瘝在抱不惜帑金發給至一百八十萬兩之多截留漕糧前後共五十五萬石又撥奉天粟米十五萬石軫念民依不爲不

厚若如該督所奏竟不借資民力於庫項先行撥墊攤廉還款是廢力役之徵並未從長計較試思各官養廉爲數無多如每差必扣勢必致無廉可領辦公竭歷成何政體且此後謁陵秋獮必應次第舉行該省地方官無廉可扣又將以何項攤捐且庫項亦不能源源接濟所謂惠而不知爲政朕不料蔣攸銛亦復如此蔣攸銛所奏是否體察本年被災情形權宜辦理抑遂欲援爲成例捐內並未詳悉聲敘殊屬含混此次姑從所請依議妥辦斷不可通行貼示以致日後扞格難行蔣攸銛接奉此旨須通盤籌畫務思朝廷大體經久可行毋爲目前之計此後宜如何設法籌辦方妥之處著卽明白覆奏尋奏借款辦理大差係體察被災情形權宜辦理報聞○甲寅命蘆溝橋等四廠外添設二廠並折米散放○乙卯以浙江杭州等三府屬水災免海運商米船稅並留各關

稅銀備賑○是月賑安徽無爲等十六州縣水災給河南濬縣等十三縣水災一月口糧並修屋費江蘇江浦等六縣水災一月口糧緩徵河南武陟等十五縣水災蠲災新舊額賦湖北黃梅縣水災錢糧展緩河南蘭陽等三縣歉收新舊額賦並儀封廬灘租

九月丁卯撥浙江鹽庫銀三十萬兩買米平糶○戊辰諭蔣攸銓奏請派員查勘紅花隄缺口一摺直隸元城縣境衛河與山東館陶接壤向有紅花隄一道以禦漳衛二河北來之水嗣因漳河南徙水無倒灌其隄段久已殘廢迨復經修建後上年豫省漳河漫水下流由大名元城直達紅花隄潰決隄埝由館陶注入衛河若將漫口堵築恐滙水無從疏洩元城縣北鄉村莊皆成澤國若不築復則館陶縣村莊又受其害事關兩省民田廬舍必須熟籌妥議以資經久著派大學士戴均元馳驛前往該處確切勘辦務令

兩無妨礙方爲盡善至內黃旗屬袁村地方因缺口多年將地畝刷成河形見在鹽運商民各船隻均以竇公河淤塞改從新刷河道行走有無阻礙並著詳加查勘後順道赴河南會同程祖洛將漳水見復東漫民埝不能捍禦宜如何設法宜洩以利修防之處悉心籌議據實具奏○己巳命浙江暫弛海禁招商赴臺販米○壬申命浙江平糶倉穀○癸酉免領運奉天賑米船帶商米二成稅○乙亥諭和孝固倫公主朕之姑也自幼仰承 皇祖高宗純皇帝鍾愛最篤嘉慶年間 皇考仁宗睿皇帝疊加 恩眷至爲優渥本年春間遽疾朕屢次遣人存問方期剋日就痊茲聞薨逝實深憫惻著賞給陀羅經被派悼親王帶領侍衛十員卽日前往奠醊朕於本月十四日親臨賜奠所有喪事一切官爲經理並派廣泰在彼妥爲照料以示優卹○丁丑永定河漫口合龍○以黃

鳴傑爲浙江布政使調吳榮光爲湖北按察使以伊里布爲浙江

按察使

由山西冀
甯道遷

○調嵩溥爲江西布政使潘恭辰爲廣西布政

使○辛巳撥部庫及江蘇各庫銀一百萬兩備江蘇賑需○壬午

上奉

皇太后啓鑾謁

西陵

○免經過地方額賦十分之三

○丙戌

上謁

泰陵

泰東陵

昌陵回鑾

○丁亥免直隸通

州等二十七州縣水災額賦○己丑

上臨奠端悃固倫公主園

寢及故大學士朱珪墓

○

上奉

皇太后還京師○庚寅命五

城飯廠加米煮賑○賜故大學士朱珪曾孫甘霖舉人○壬辰諭

軍機大臣等戴均元奏查勘直隸元城縣北境紅花隄見在內外

地畝全行涸出業經補種麥苗據戴均元率同該道府等逐加履

勘有大缺口一處約長四十丈係上年漳河漫水沖缺其餘歷年

漫開大小缺口尙有六七處惟漳河上游從何處漫缺下注必須

東華續錄

道光八

七

將來路究明方可疏治著戴均元於馳抵河南安陽縣後會同程祖洛親歷上下確切查勘應如何設法籌辦據實奏明辦理至元城境內引河一道由府城東南隅至何家莊穿隄入衛河身窄狹易於衝潰該民人情願自行改挖著知會直隸總督卽飭元城縣將河身挑直量加展寬以暢其流其紅花隄缺口下有新刷水溝由館陶之徐家倉入衛五百餘丈該處地勢較窪著將溝槽挑成河道以期分流洩水並建築東西兩隄俾免旁溢其開溝築隄之處皆係民田著覈計地畝豁免錢糧給還地價需用公費卽飭該管知府確估借帑興修事竣攤徵還款○以松筠爲吉林將軍穆彰阿爲左都御史調裕恩爲戶部左侍郎奎照爲吏部右侍郎以多福爲刑部右侍郎

由左副都史遷

○是月賑直隸通州等四十州縣

山東臨清等五州縣水災加賑江西德化縣湖北黃梅縣河南武

陟等五縣水災給江蘇儀徵等四縣湖北江陵等三縣水災口糧並修屋費蠲緩山東臨清等十六州縣衛直隸薊州等五十州縣水災新舊額賦河南武陟縣湖北黃梅縣水災額賦及屯坐各衛應徵新舊額賦並給修屋費緩徵江西德安等十三縣額賦直隸昌平等三十州縣新舊糧租長蘆被水課銀展緩齊齊哈爾等四城應還貨糧

冬十月癸卯諭戴均元等奏會勘新刷衛河一摺前因內黃縣袁村地方將地畝刷成河形見在鹽運商民各船均改從新河行走經朕特派大學士戴均元會同程祖洛將有無妨礙之處詳加查勘茲據奏稱衛水向係經寶公河下注因漳水挾洄而來將衛水頂阻旁決袁村今漳水業經北趨改由慶豐莊歸入正河其寶公河上游止係洄水較前此漳洄合流衝衛情形迥異衛水自袁村

決口刷有河槽則漳衛分流輕減水患實爲可乘之機自應通籌全局開治新河惟衝刷處所閒有淤淺兩岸亦恐旁溢應行挑挖深通並築隄捍衛著一併相機妥辦其瓠子背東岸溝形一道偶遇漲水卽由龍王廟地方歸入正河著於該處築鉗口壩夏開冬閉以備宣蓄惟內黃縣境東袁村等村漫水穿村行走居民難免浸灌著於東袁村大晁村疏濬支流將村口正流堵塞其大杜村之水無支流可引著於該村前後築隄捍衛旁溢支流悉行堵閉使全溜俱歸正河所有新河經由處所除直隸境四十餘里黃河故道本無錢糧外其餘行糧民地久經水衝沙壓雖未咨請豁免而歷年錢糧多係緩徵著自道光三年爲始將河身所占地畝應徵錢糧並前此歷年緩徵錢糧均確查題請豁免其築隄占用民地亦著照公占田地之例給予地價工程經費見據該商等呈請

捐輸著直隸總督長蘆鹽政會同程祖洛委員確查籌辦俾衛河

久遠暢行以奠民居而利商運○己酉以武隆阿爲內閣學士兼

禮部侍郎銜

前任西甯辦事大臣

○擬安徽關稅及捐監銀十萬兩並本省

耗羨銀備無爲等三十三州縣衛賑需○辛亥撥龍江等關稅銀

三十三萬兩備江蘇太倉等四十七州縣衛賑需○王子分青海

蒙古河北二十四旗爲左右翼每翼添設正副盟長各一每六旗

設扎奇噶克齊一每三旗設梅楞一每旗設扎蘭一○癸丑內閣

學士徐頤以病免○甲寅帥承瀛奏浙商捐銀備賑 上不許仍

准應完各款加展五綱○撥浙江運庫銀三十萬兩備海甯等二

十州縣衛賑需○乙卯賜張從龍等五十三人武進士及第出身

有差○丙辰加恩舊學贈故內閣學士徐頤侍郎銜予祭葬賞其

子綸舉人○添設河南睢甯廳蘭陽汛額外委一○庚申諭戴

均元等奏會勘漳河漫口迤下情形設法籌辦一招治水之法合則爲患分則安流漳河性本湍悍自乾隆五十九年由三臺村南徙合洹以來衛水爲其頂阻漳與洹每值夏秋同時異漲民埵不能捍禦以致安陽內黃迤下各處頻年衝決此合則爲患之明證茲據戴均元會同程祖洛前往周厯履勘衛水由袁村迤東衝刷成河經百六十餘里至大名縣之岔河嘴而後與漳合洹水復由原路獨行百餘里至楚旺而後與漳合見在漳河北徙雖無一定河槽業已分殺水勢自當爲因勢利導之計著照所請於樊馬坊馮馬坊陳家村湘河河幹各處北岸支流築作柴壩堵截使河幹迤上分流歸併一處田市北岸水高南岸一尺有餘卽就高灘挑挖引溝一道俟漫水消涸再將辛莊一帶漫灘之水勘明築壩堵閉完密以資直隸大名等處捍衛其梗阻河心之田家營等十處

南北兩岸迎溜處所編設柴壩以護民居北岸上游商家村孫陶集兩處壩工卑薄卽飭鑲修高厚並加築挑壩土格以期穩固自柴村橋起跨壓新淤河形接連洹河北岸民埝建築土埝一道再將舊民埝培厚加高樊馬坊迤下南岸王家口築作土格土壩以免串流南趨使漳洹不至再合所需工料著程祖洛飭勘確估設河勢再有變遷見在擬辦工程有應量爲增減者隨時奏明辦理一切經費先由司庫借項興修事竣攤徵歸款河身所占地畝應徵錢糧卽飭地方官查明照例題請豁免至修隄築壩事宜著河北道鄒錫澹往來稽察懷慶府知府王康父總司其事妥爲督辦前任汝甯府知府王世臣常駐工所會同該府督飭該縣及工員等實心經理務於明歲春融趕緊興辦限四月內完竣仍俟新河行走一年後該撫審度形勢如尚有當修治之處再行奏辦○王

戊以那丹珠爲左副都御史

由太僕寺卿選

○以糜奇瑜爲太僕寺卿吳

榮光爲貴州布政使宋如林爲湖北按察使

由浙江鹽運使選

○是月賑

湖北江陵等三縣衛水災並免新舊額賦給修屋費貸奉天錦州旗民山東武城縣水災一月口糧直隸天津鎮三營及紫荆關各汛被水兵丁銀米緩徵安徽無爲等四十二州縣江蘇高郵等二十九州廳縣山東濟甯等七州縣衛新舊額賦奉天甯海縣歉收本年額賦湖北沔陽等十一州縣及屯坐各衛新舊額賦山西五臺縣水災春借倉穀兩淮安豐等九場歉收竈課並應還貸糧

十一月丙寅以惠顯爲福建布政使調齡住爲安徽按察使以盧

元偉爲山西按察使

候補四品京堂

○辛未裁貴州普定縣屬土千總二

土把總五○乙亥以成格爲刑部左侍郎毓岱爲廣西巡撫

病痊

○庚辰再撥銀二十餘萬兩備直隸賑需○丁亥諭定例冊封皇

貴妃貴妃妃俱祭告 太廟後殿 奉先殿封嬪無告祭之文向

來翰林院恭擬告祭文內有冊封嬪文係照成案辦理於成例未

能相符嗣後封嬪不必告祭即與妃同日冊封亦無庸將封嬪告

祭著爲令○諭戶部軍需局係因辦理軍務而設此時自無庸設

立專局著照戶部所議將該部軍需局裁汰一切檔案酌量分派

陝西山西二司承辦以復舊制其嘉慶年間軍需未結各案亦責

成兩司司員上緊清釐以銷塵牘而重帑項○申定廣東福建捉

人勒贖治罪例○免山東海販奉天雜糧稅○己丑晉封和嬪那

拉氏爲 和妃 全嬪鈕祜祿氏爲 全妃祥貴人鈕祜祿氏爲

祥嬪○辛卯敕諭哈薩克汗愛畢勒達曰昨據伊犁將軍奏爾

遣弟占圖喇蘇勒坦呈遞回字文稟內稱爾父瓦里蘇勒坦上年

病故爾父喪事完畢即遣爾弟占圖喇蘇勒坦等呈報事故恭進

貢馬並爾父故後哈薩克等眾公議願爾承襲汗爵因未奉諭旨
不敢稱汗祈朕矜恤施恩等語朕聞爾父身故甚爲軫惜爾祖爾
父均屬恭順仰受朕恩茲爾父身故爾雖管轄哈薩克等眾因無
朕旨不敢稱汗特遣爾弟占圖喇蘇勒坦稟稱眾皆願爾爲汗請
朕諭旨尙屬出於至誠實堪嘉尙汗爵係爾祖父所遺爾父在時
爾卽幫辦遊牧事務屬下哈薩克等均皆敬服爾能約束伊等朕
所確知特命大臣齎去銀紙等物賜奠爾父爾父汗爵加恩卽著
爾襲封錫以詔書爾接奉此詔惟當感戴朕恩哈薩克等眾留心
妥爲管束友睦子弟勿生事端肅清邊陲嚴擊盜匪和輯鄰封凡
一切事務悉聽伊犁將軍塔爾巴哈台參贊指示妥爲辦理不可
絲毫冀倖取巧爾果能如爾祖父勤恪朕必倍加優眷爾宜欽遵
恩旨以期萬萬年永受朕恩欽哉勿怠今因頒詔賞爾大段四匹

齋到祇領再據伊犁將軍轉奏爾遣爾姪阿布賚蘇勒坦伊弟丕
喇伊里蘇勒坦等祈將爾故兄阿帕斯蘇勒坦公爵恩賞阿布賚
蘇勒坦承襲等語此公爵係爾祖父宣力多年 特恩賞給並非

世襲今阿帕斯蘇勒坦病故理應停襲惟念爾姪阿布賚蘇勒坦
遠遣伊弟丕喇伊里蘇勒坦等恭請朕安並進貢馬尙爲恭順將
此公爵卽賞阿布賚蘇勒坦承襲此係朕矜恤外藩恩施格外不
可爲例將此明白曉諭爾姪阿布賚蘇勒坦知之特諭○是月貸
甘肅靜甯等十六州縣災民口糧蠲緩湖南澧州等五州縣水災
甘肅宜禾縣旱災新舊額賦緩徵江蘇太倉等二十一州縣廩衛
水災甘肅靖甯等十三州縣歉收新舊額賦熱河歉收莊頭差米
十分之三山東臨清等處被災引課及加價銀奉天各城兵丁應
還倉穀

十二月辛丑裁貴州長寨同知所屬中順里土外委○壬寅調訥

爾經額署安徽按察使以劉斯喟爲山東按察使通判趙鼎○以

內閣學士武隆阿爲直隸提督○乙巳添設京城南鄉飯廠煮賑

○以白鎔爲內閣學士兼禮部侍郎銜輔○庚戌以辛從益爲

禮部右侍郎學士選○甲寅諭前據松筠奏雙城堡屯田情形請

先移駐在京閒散宗室並以雙城堡原議移駐京旗閒散查有盛

京養息牧及大凌河二處均可籌辦移駐本日軍機大臣會同宗

人府議奏宗室分駐吉林散處各屯諸多窒礙並據晉昌奏查明

養息牧大凌河二處牧廠荒地勢難再議開墾各等語養息牧大

凌河二處牧廠試墾不便情形嘉慶年間屢奉 皇考仁宗睿皇

帝諭旨駁飭彼時松筠曾以此被議卽不應於此時再行瀆奏且

松筠見任吉林將軍實屬越俎該將軍固執前見不顧事理之是

非意在必行其說所奏尤爲荒謬松筠著交部議處○賞和孝公
主子輕車都尉富那二品頂帶○以陝西南山地方安靜加陝安
道嚴如煜按察使銜○改江蘇淮安府檢校爲清河縣巡檢○清
直隸通惠河○乙卯諭御史王世紱奏請嚴京察一摺國家激敘
官方三載考績爲激揚之大典朕恭讀嘉慶五年十一月 皇考
仁宗睿皇帝特諭近年以來六部堂官所拔識之司員大率以迎
合己意者爲曉事之人以執彙剖辨者爲不曉事之輩以每日偃
謁卑詞巧捷爲勤慎以在司坐辦口齒木訥者爲迂拙遂致趨承
卑鄙之憐昏夜白晝驕人仕路頽風幾不可問朕思轉移風氣之
方須立矜式觀摩之準見已將屆京察之期各部俱應慎重選舉
以公心辦公事勿存絲毫私意問心無愧斯可對君此旨著通行
曉諭各錄一通懸於公署朝夕觀覽等因欽此 聖訓煌煌至爲

詳備部院各堂官果能實力奉行自可黜陟允當朕卽再降旨申諭亦不能出 聖諭之範圍如該御史所奏歷屆京察有出任道府督撫撤令回京者堂官薦之於前督撫劾之於後或保或參互相矛盾此言未嘗不是然猷守兼優者固屬攸往咸宜其資格較久謹愿樸實之員原有部務熟悉而初膺外任未必裕如者朕屢飭直省督撫隨時甄別原非一經薦舉卽不復加以參劾也其衰庸各員該堂官等自應嚴加甄汰儻憐其衰憊特予矜全曲徇人情好爲姑息一經發覺惟該堂官是問至所稱候補各員有才堪造就不妨試以吏案策勵使前似爲得人起見然候補人員於彙案事件原應一律講求以期熟悉至補缺先後挨次敘用自有一定成例各衙門有例可循尙恐堂官以愛憎爲取舍不盡公允若妄更成例越次揀選名爲鼓勵人才實以開奔競之門躁進者遂

捷足先得守分者必致補缺無期此端一開流弊滋甚所奏斷不可行至各員簡擢外任或因貧劣被參原保各官吏部本有處分定例亦無庸更立科條也○召廉敬來京以蘇成額爲山西布政使鄂山爲河南按察使由陝西調○丁巳和桂緣事降調調博啓圖爲倉場侍郎轉舒英爲禮部左侍郎調明志爲禮部右侍郎以色克精額爲理藩院右侍郎由內閣學士遷○張映桂緣事降調調顏檢爲倉場侍郎顧臬爲戶部右侍郎顧德慶爲工部右侍郎轉朱士彥爲兵部左侍郎以賈允升爲兵部右侍郎由左副都御史遷○戊午諭松筠於盛京養息牧大凌河二處牧廠不便試墾之地固執前見率行清奏並自請前赴盛京會勘籌辦實爲越俎荒謬部議降二級調用本屬咎有應得姑念其究係因公松筠著加恩改爲降二級留任不准抵銷○祥德以病免調宋如林爲貴州按察使以王惟

詢爲湖北按察使

由浙江鹽道遷

○庚申調訥爾經額爲山東按察使劉

斯嘯爲安徽按察使

○辛酉諭回子阿布都哈里從前曾經賞給

原任大學士傅恒使令今平定回疆已越多年各回子王公等俱

極恭順出力著加恩將阿布都哈里及伊子博巴克阿布都色默

特伊孫阿錫木俱著賞給馬甲錢糧入於正白旗蒙古當差○召

陳若霖來京命戴三錫以二品頂帶署四川總督調陸言爲四川

布政使以福縣爲直隸布政使董涇爲直隸按察使

由通永道遷

○是

月貸江蘇蘇州等五府州駐紮災區兵丁銀米緩徵浙江秀水等

七縣災民口糧湖南安鄉縣被淹湖田額賦展緩雲南被水竈課

○是歲朝鮮琉球暹羅緬甸來貢○會計天下民數除直隸武

清等三十一州縣江蘇福建臺灣等處未經咨報外各省通共大

小男婦三萬七千五百一十五萬三千一百二十二名口各省通

共存倉米穀三千四百八十九萬六千六百六十六石七斗五升四勺

東華續錄

道光九

臣王先謙敬編

臣周嗣蕃恭校

道光四年甲申春正月壬申諭朕恭擬三月叩謁東陵以伸誠

悃但直隸兩年收成歉薄彼時正值青黃不接之時民力維艱著暫行停止前往再今歲秋獮木蘭允宜遵循成憲肄武綏藩然

不可不審度時勢量爲展緩今歲亦著停止此朕不得已之苦衷

非敢耽於安逸也直省大吏務當體朕之心爲心懲黜昏墨獎勵

賢能凡有益於民者盡心講求期吾赤子共免顛沛流離以佐朕

順時休養之至意○癸未停奉天採買粟米撥戶部銀四萬八千

兩貸直隸貧民口糧○甲申諭軍機大臣等本日據黎世序奏患

病請假調理已明降諭旨給假兩月並賞人蔭五兩俾得安心調

養河督事務令孫玉庭暫行兼署矣朕思河務一切事宜與地方情形不同非熟諳修防實心任事之員不能得力總在平日留心察看儲養人才方足以資任使孫玉庭兼轄河務黎世序職任總河均已敷歷多年於河務人員自必周知有素著於兩江及豫東兩省司道各員中有通曉河務結實可靠者卽密保一二員據實具奏○丁亥諭本日據軍機大臣大學士會同戶部議奏保送倉監督激勵章程一摺所議是各倉花戶飭法總由監督約束不嚴自應慎加遴選明示勸懲不可僅應故事務從其實以收得人之效嗣後各衙門保送監督欽天監太常寺鴻臚寺鑾儀衛各衙門司員俱著無庸保送見任各員不必撤回仍責成該侍郎等隨時甄別未補各員槩予註銷其餘各衙門仍照向例令各該堂官擇其明白體面兼有才具者秉公保送其結實可靠之員准其奏留

再任三年儻始終奮勉隨時奏請卽予升途至京察之年並著添保一員滿漢相間輪保務擇才守俱優者列爲一等不得先儘坐糧廳大通橋監督以昭公允各倉監督除舞弊得贓隨時嚴辦將原保堂官交部議處其不實心任事者著該侍郎隨時參處庸懦無能者咨回原衙門行走並著停升三年雖俸滿亦不准保送外任至花戶舞弊係監督自行查出者卽專治花戶應得之罪監督失察處分槩予寬免向例倉監督給予養廉止領半俸嗣後並賞給全俸用資辦公卽自本年春季爲始其萬安海運二倉事務本繁著該侍郎於各監督內揀員調補自此次立定章程之後務各秉公選擇實心整頓以杜積弊而慎倉儲○辛卯以劉彬士爲左副都御史

由大理寺郎遷

○是月展賑直隸通州等三十八州縣上年雹

災河南武陟縣濬縣旱災各一月給江蘇太倉等三十州縣衛安

徽無爲等十七州縣衛浙江海甯等十二州縣橫浦等四場兩淮
安豐等九場水災山東臨清等五州縣雹災一月口糧貸河南武
陟等十二縣上年水災籽種口糧省穀江西德化等十四縣湖北
黃梅等三縣及各屯衛湖南澧州等四州縣甘肅秦州等十州縣
齊齊哈爾等三城被災軍民籽種口糧江蘇泰興營兵丁兩月錢
糧緩徵直隸通州等一百一十一州廳縣山東德州等二十州縣衛
本年額賦展緩長蘆豐財等四場上年電丁借銀

二月丁酉諭本日據軍機大臣會同戶部堂官議覆松筠等奏漢
務章程一摺所議是吉林漢務節經立定章程而攬頭刨夫尙形
苦累自應量爲調劑所有綏芬烏蘇里產漢山場住山過冬刨夫
著准其仍復舊規辦理並令各攬頭舉熟習刨夫令在蘇城蘇子
海訥思屯呢滿口等處尋採按額交上等好漢挑贖餘漢方准賞

給售賣如有成色蒙混情弊卽著落賠換重責示懲其每年留山
刨夫不得過每票人數之半如有事故該攬頭於放發票前註冊
更換責成押票章京隨時稽察儻潛行透漏從重究治稍有疏縱
將該員等分別議處並著守卡弁兵查驗勿任黑人夾帶私濫以
昭嚴密至松筠等奏請在小綏芬雙城子達塌河一帶屯田墾種
以供刨夫糧食耕植採澁本難兼顧辦給農具殊形繁費且道里
遼遠官兵稽察難周尤恐別滋事端轉啓奸民窩藏寄頓等弊著
無庸議朕因松筠熟悉吉林情形簡畀將軍重任乃一赴新任遇
事紛更種種錯謬松筠不勝吉林將軍之任吉林將軍仍著富俊
補授富俊覆奏刨夫攬頭等苦累情形請援照嘉慶初年濫餘銀
兩每兩酌減六七兩以十三四兩抽收以裕商力及屯兵交倉糧
石糶價不敷原奏四錢之數並著富俊於到任後察看該處情形

據實詳晰具奏又諭穆彰阿著補授理藩院尙書松筠卽補授左都御史此係朕眷念舊臣格外施恩賞給差使松筠務慎守本任舊章無得仍蹈故轍致干咎戾○江南河道總督黎世序卒贈尙書銜晉太子太保以張文浩代之

署工部左侍郎

○戊戌撥北新倉稷米

三萬石稷米二萬石給五城平糶○禁江蘇潯場兩關濫徵商課

並申定權稅章程○以誠端署江蘇布政使

前任福建布政使

○己亥

上御經筵○辛丑諭禮部將原任河道總督黎世序應得卹典察

例具奏覽之倍覺惻然黎世序宣力河防十餘年來懋著勤勞克

盡職守允宜特予恩施以昭勳績著加恩賜諡襄勤入祀賢良祠

並照部議給與祭葬碑價銀兩由該衙門撰擬碑祭文一體頒給

用示朕眷懷盡臣至意○甲辰以武忠額福勒洪阿張麟俱爲內

閣學士兼禮部侍郎銜

武忠額由詹事府勅領張麟由太常寺勅領

○以程含

章署工部左侍郎辦理直隸水利

勘籌護江西巡撫由布政使護理

○改

福建艍舫營遊擊爲水師參將駐噶瑪蘭添設噶瑪蘭營都司千

總各一外委二都司駐伍園移伍園守備駐頭園頭園千總駐三

紹○壬子諭軍機大臣等原任江南河道總督黎世序夔經降旨

優予恩施而追念賢勞彌深軫結特製遺問詩一首著交程祖洛

於接奉後俟黎世序靈柩到籍卽發交伊家祇領墓泐立石墓前

用示朕眷念盡臣至意○借撥直隸通永霸昌兩道庫款展賑飢

民○甲寅

上奉

皇太后幸南苑

上行圍○乙卯以直隸水

災命平糶倉穀○己未

上奉

皇太后還京師○裁貴州歸化

廳屬生苗枝土千總○是月給江蘇銅山縣災民一月口糧展緩

河南睢州等二十八州廳縣加價銀緩徵江蘇高郵等五十四州

廳縣衛上年水災額賦

三月甲子朔調毓岱爲江西巡撫以康紹鏞爲廣西巡撫

服闋前署侍郎

○丁卯頒御製養正書屋全集於國子監○戊辰以裕陵

隆恩殿工竣復縣課親王爵戴均元太子太保○乙亥上親耕

藉田○禁直隸屯居旗戶私設總催領催名目○己卯築直隸新

開衛河隄埵並添建壩座○庚辰同麟以病免以海齡署盛京刑

部侍郎轉色克精額爲理藩院左侍郎以凱音布爲理藩院右侍

郎

出左副都御史遷

○辛巳諭據戶部奏各省關稅銀兩除本省扣充兵

餉及部議准其動撥外餘俱解交部庫以供京營兵餉及一切經

費請飭各督撫毋得自行指撥等語國家薄賦輕徭各項錢糧從

不輕加銖黍歲入歲出俱有定額並非務爲封殖各省關稅銀兩

解存部庫原以備庶政之需若任聽外省自行指撥在各關監督

不過節省運費而庫項漸少歲支各款又將何項應用嗣後各省

督撫如有迫不及待之項仍准其聲敘實在情形奏明辦理其非迫不及待之款遇有需用或另籌閒款或飭部酌撥毋得率行指撥關稅以符定制○甲申裁廣東潮陽營屬門關礮臺青嶼礮臺把總外委各一添設普甯縣城千總外委各一移石井礮臺千總駐青嶼門關礮臺外委駐石井○丁亥 上閱健銳營兵○以河南省新開衛河支流上游築壩給居民地價並免額賦○初彭齡以年老乞休允之賞半俸以陳若霖爲工部尙書前任四總督○戊子以審辦傳教逆匪馬進忠一案詳慎妥速賞署山東巡撫琦善署按察使訥爾經額花翎餘升補有差○是月展緩浙江幫丁應繳銀

夏四月丁酉修直隸南北運河隄壩並清苑等二十二州縣橋道隄埝○壬寅命程含章會同蔣攸銑籌辦直隸河工○命查嘉慶

八年以前陝西陣亡鄉勇入祀昭忠祠○乙巳諭刑部審理案件必須盡心推勘將真實情形水落石出方足以昭執法之平上年內閣有遺失金葉表文一案黏桿處有遺失蝦鬚鉤魚竿等件一案近又有內閣遺失硃籤一案俱經刑部審訊具奏並未究出被竊緣由及贓賊確據刑部爲刑名總匯於各犯到案固不可一味刑求致使無辜受累然果能悉心研究豈有尋常盜竊之案轉不能審有端倪若徒以一奏了結則正盜漏網奸猾之徒益復無所忌憚其何以明罰敕法耶嗣後遇有此等案件該堂官務督飭司員詳慎推鞠總期人賊並獲按律定擬斷不可顛預了事致滋寬縱如案已奏結或在逃正犯別經發覺朕惟該堂司各官是問恐不能當其咎也○諭軍機大臣等本日御史陳懷奏永定河開壩減河情形據稱前聞河臣張文浩查辦直隸水利議於永定河南

岸建設閘壩挑挖減河見已興工於南岸修復金門閘挑挖減河一道又於閘上建灰壩一座挑挖減河一道皆爲分減盛漲洩入大清河之用查金門閘久經堵閉乾隆年間孫嘉淦曾於閘上開放南岸洩水入中亭河不能容納附近民田受害旋即趕緊堵築今新開減河放水灌入清河與孫嘉淦所爲無異况清河壅塞不能容納減水易滋漫溢等語大清河貫串東西兩淀因下游爲永定河濁水所淤上游頻年潰決畿南十餘州縣被災獨重必須先從下游疏治俾得暢流入海若專在上游僅輸濁水則壅遏泛濫爲患彌甚此事關係全河大局不可不計出萬全著交程含章蔣攸銛再加相度通盤籌畫務使隄障田廬兩無妨礙方爲至善尋奏查永定河縣長四百餘里兩岸皆沙不能如江南之土性堅實可以加高培厚自嘉慶六年全河漫口北上汎土山衝刷殆盡此

時補偏救弊惟有修復金門閘並於南上汛添建灰壩盛漲時出水不過二三尺歷時不過一半日與乾隆五年孫嘉淦奏准將永定全河入金門閘引河下注者迥不相同容親赴永定覆勘妥籌從長計議報聞○戊申諭御史蔡學川奏請嚴禁幕友濫邀議敘一摺所奏是朝廷議敘之典原所以鼓勵人材至幕友襄理幕務由本官自行延請與在官供職者不同若以有職人員舍官就幕遂得濫邀議敘既難免大員市恩瞻徇等弊且開各項人員規避取巧之端嗣後各督撫鹽政等奏請一切議敘概不准將幕友保列以杜冒濫○己酉訥爾經額因病賞假以賀長齡署山東按察使由吏部咨○癸丑恭纂 仁宗睿皇帝實錄 聖訓成○乙卯

上詣 黑龍潭祈雨○辛酉定編譯進士出身之小京官筆帖式推升漢字堂主事例○以寶興爲左副都御史由吏部咨○是

月貸湖北武昌府屬道士汛營荊州城守等營兵丁倉穀江南徐州鎮標中營等駐紮災區兩月錢糧緩徵山東濱州等二十州縣及各屯衛新舊額賦

五月癸亥朔裁貴州貞豐州屬羅炎司土外委○甲子諭刑部奏審訊山西榆次縣民閻思虎強姦釀命大槩情形已據各犯供證確鑿並聞思虎親供是強非和毫無疑義此案該省承審各員顯有助屬徇縱回護刑偏情弊榆次縣知縣呂錫齡著卽革職太原府知府沈琮忻州知州慶純平定州知州賈亮采太原縣知縣章頌椿俱著解任著邱樹棠卽行派委委員迅速押解來京榆次縣門丁蘇大尤爲案內要犯卽著呂錫齡於任所交出不准藉詞脫逃同應訊之榆次縣刑書輩必達卓役曹宗洛散役要維郝明武思德郝添源仵作李文及說合過錢之下尊周等一併提齊分起

解送到部歸案質訊該撫務嚴飭委員沿途小心管解趕緊行走
儻有疏虞惟該撫是問恐不能當此重咎也○乙丑諭趙慎畛等
奏閩洋米艇戰船緝捕不能得力請全行裁汰一摺閩洋米艇船
隻前因慶保等以船身遲笨駕駛未能得宜奏請裁汰十五船當
經降旨准行並令將裁贖船隻俟應拆修之時照同安梭船式一
律改造茲據趙慎畛等查明見存米艇各船仍難適用見屆大修
小修若仍舊修造未免帑項虛糜自應全行裁汰著照所請除已
改造之勝字六號等米艇八隻堪資得力無庸議裁外所有見在
屆修駕廠之勝捷兩字號同擊碎之捷字六號十二船俱著卽行
裁汰其存營駕駛之勝字一號十號並甫經修竣之勝字三號等
三船仍俟屆修之時一律全裁分別變價報撥以節糜費而收實
用○己巳 上詣 黑龍潭祈雨○朱桂楨因疾賞假以王檢署

山東布政使由鹽運使署

○庚午准江蘇留解部銀十五萬兩潞太湖

下游水道○甲戌甫○諭 堂子祭 天典禮甚重見在禮部纂

輯通禮著於吉禮中 南郊 北郊大祀之後謹增致祭 堂子

之禮以昭明備至 太廟 社稷壇謝福胙之禮俱仍照舊例行

○戊寅諭向例 皇太后萬壽聖節告祭 奉先殿並 太廟後

殿典禮甚重自道光元年以來欽天監於祭祀冊內未將告祭日

期敬謹載入實屬疏漏欽天監堂官著交部議處禮部於欽天監

初次送到祀冊未能即時詳查駁正亦有不合見經據實檢舉所

有該部堂官著加恩改爲交部察議嗣後 皇太后萬壽聖節應

行告祭 太廟後殿之處著欽天監載入祀冊禮部於通禮中一

併增載永遠遵行○申諭浙江江蘇安徽等省編查棚民保甲○

庚辰山西巡撫邱樹棠奏遵將承審閭思虎案內之府州縣各員

解京並自請交部嚴議得旨刑部定案時再降諭旨此案初結時未能詳覈已屬草率及奉旨交審後何以又不親提人犯秉公昭雪乃一味疲玩任聽此等不堪之府州縣昏愚欺蒙喪良回護幾將貞白之烈女埋恨九京兇淫之惡棍幸免刑章天理人心不可問矣若呂錫齡者早應罷黜何得反畀以要缺思及此皆因朕無知人之明用此等不識人之大吏使小民動輒含冤實深慚懼憤懣也○辛巳吏部奏官員爲生祖母治喪請仍照舊例無論嫡祖母是否見在槩令治喪一年許其離任從之○乙酉添設山西佛坪撫民同知巡檢各一裁卸陽縣縣丞改盤陽縣丞爲鎮平縣丞鎮平巡檢爲袁家莊巡檢○丙戌添建廣東省垣監獄改河泊所大使爲管獄官○壬辰以湖南澧州等四州縣水災命平糶倉穀六月癸巳朔日有食之○丁酉申諭各督撫詳鞠京控案件○辛

丑河南巡撫程祖洛奏祥符等縣呈驗雙歧瑞麥兼有一莖三穗至九穗者得旨止祈一律豐收天恩廣被不必計穗之多寡也○乙巳諭山西榆次縣民間思虎強姦趙二姑一案前經趙添中以該知縣當堂偏認和姦致趙二姑忿激自盡等情赴京控告降旨交邱樹棠親提嚴審嗣該撫仍以和姦擬結御史梁中靖參奏復諭令將人證卷宗提解刑部審訊始據刑部審明據實平反並將該省承審各員賄屬舞弊各情逐一究出此案間思虎強姦釀命實屬淫兇著照例斬監候入於本年朝審情實辦理趙二姑猝遭強暴捐軀明志洵屬貞烈可嘉著禮部照例旌表已革榆次縣知縣呂錫齡首先承審膽敢執法營私致釀人命昏墨欺蒙情殊可惡著發往伊犁充當苦差解任太原府知府沈琮於所屬知縣聽從賄屬各情毫無覺察及提府審訊又復有心回護其代慶純等

捏敘說單爲消弭刑偏勒結地步尤屬詭譎沈琮著革職發往烏
魯木齊效力贖罪解任忻州知州慶純平定州知州賈亮采未能
悉心推鞠率照和姦取供意存迎合上司非尋常失出可比慶純
賈亮采俱著革職發往軍臺效力贖罪解任太原縣知縣章頌椿
於填寫屍格迹涉含混並誤取犯供實屬無能溺職章頌椿著卽
革職按察使盧元偉督審重案所訊各情均係輕重倒置種種錯
謬幾成冤獄盧元偉著卽革職巡撫邱樹棠以特旨交審之案不
卽親行審訊任聽屬員草率遷就顛預入奏實屬孤恩溺職卽將
該撫革職亦係罪所應得姑著加恩降爲按察使以觀後效刑部
堂官及承審此案司員秉公研鞠伸雪沈冤使兇徒不至漏網辦
理尙屬認真俱著加恩交部議敘御史梁中靖參奏得實著加恩
賞給四品頂帶仍交部議敘以示獎勵○以張師誠爲山西巡撫

○調邱鳴泰爲山西按察使以邱樹棠爲福建按察使○丙午改湖北白河廳撫民同知爲鄖陽府分防督捕同知白河廳訓導爲保康縣訓導豐溪巡檢爲鍾祥縣巡檢駐豐樂河白河廳照磨爲穀城縣巡檢駐張家集九道梁輒磨坪二巡檢仍歸房縣管轄○庚戌諭各督撫不准擅動地丁正項修理各工○壬子建雙城堡義學並禁屯丁過江樵採○乙卯命戶部籌撥銀一百二十萬兩興辦直隸水利○丙辰定 太廟 夕月壇 歷代帝王廟 謝福胙禮○庚申調邱樹棠爲江西按察使魏元烺爲福建按察使